

■ GLOSSA

Simonetta Sommaruga schloppa e vegn ord la crosa

DA CLAUDIA CADRUVI / ANR

Ella è adina uschè controllada. Ma il glindesdi passà ha Simonetta Sommaruga gì avunda. «Manegiais Vus propi che la regenza saja uschè tgutga?» ha ella dumandà. Ier ha il video fatg la runda.

Capità èsi en la chombra pitschna durant la debatta davart la situaziun cun ils fugitivs. Gia dapi mais sto la ministra da giustia tadlar critica. La pps discorra d'in caos d'asil e schizunt il president da la pld Philipp Müller dat en questa crenna: «Ella na fa insumma nagut.» Uschiiglio na lascha Sommaruga mai sentir la minissima smiula d'in'emoziun. Sias respostas èn adina baindosadas ed ins ha l'impresisiun sco sch'ella controllass mintga pledin sin sia cumpatibilitad etica e correctadad politica.

Ma questa giada è il pled «tgutg» – en tun original tudestg «blöd» – schluità ord sia bocca. La magistrata è vegnida ord la crosa. Igl è stà sco sch'in pitschen ventil – sco quel d'in duromatic – avess laschè mitschar in buffin



gritta ord il stumi ministerial.

Betg da smirvegliar: La pps pretenda controllas sistematicas als cunfins. Quai vul dir ch'ins stuess controllar mintga persuna che vegn en il pajais. Gliez n'è betg pratitgabel. Controllas pli severas sco la Germania u l'Austria fa la Svizra gea gia daditg.

Tuttina han ils representants da la pps insistì che la crisa da fugitivs, il turissem criminal e las atatgas terroristicas a Paris giustifitgeschian controllas sistematicas. Il cussegl federal n'haja betg sut controlla la situaziun e n'interprenchia nagut. «Manegiais Vus propi ch'il guvern naziunal, las autoritads, la confedera-

ziun, ils chantuns, las citads e vischnancas sajan uschè tgutgas e na fan uss simplamain nagut? Pensa propi insatgi da vus en questa sala insatge uschia?» ha ditg Sommaruga. Quest statement fa uss la curella sco video.

Betg mo tschertgels politics giaudan il filmet. Anzi, gist glieud giuvna che s'empipa uschiiglio da la politica ha mirveglias da guardar co che la magistrata di cler e net tge ch'ella pensa.

Il cas regorda a lezza giada che Hans-Rudolf Merz è schluppà dal rir durant l'ura da dumonda. Il minister da finanzas avess gì da preleger ina resposta appartegnent tariffas da dazi per charn cundida sco per exempel per pulpa grischuna. Pervi da las formulaziuns fasierlias e birocraticas da sia atgna administraziun ha Merz ris larmas. Avant tschintg onns èn sias risadas stadas il hit sco filmet sin youtube.

Igl èn ils muments sincers che fascineschan e che mancan anc memia savens en la politica.